

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05-05409-2012  
Broj akta: 01EH-001  
Gračanica, 11. 12. 2012. godine

Z A P I S N I K  
SA KONSTITUIRAJUĆE SJEDNICE OPĆINSKOG VIJEĆA  
GRAČANICA

Održane dana 27. 11. 2012. godine, u sali za sjednice Općine Gračanica sa početkom u 11.00 sati.

Sjednici prisustvuje svih trideset novoizabranih članova Općinskog vijeća Gračanica.

Sjednicu je otvorio i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i gosti: Općinski načelnik Nusret Helić, šef kabineta Općinskog načelnika Omer Hamzić, šefovi službi za upravu, Senaida Šaković, Zijad Dedić, Aida Hodžić i Mustafa Bajić, općinski pravobranilac Jasminka Imširović, članovi Komisije za izbor i imenovanje Esed Mujačić, Senad Memić i Fahrudin Kurtović, te predstavnici sredstava informisanja.

Pozdravljajući sve prisutne u svoje lično ime i u ime radnog predsjedništva, te čestitajući Općinskom načelniku Helić Nusretu na ponovnom izboru na poziciju Općinskog načelnika općine Gračanica, kao i svim novoizabranim članovima Vijeća, predsjedavajući Općinskog vijeća Gračanica, gosp. Edin Ibrišević je upoznao prisutne da je na kolegiju dogovoren termin za konstituirajuću sjednicu.

Tom prilikom utvrđen je sljedeći dnevni red:

1. URUČIVANJE UVJERENJA CENTRALNE IZBORNE KOMISIJE BiH O DODJELI MANDATA OPĆINSKIM VIJEĆNICIMA
2. SVEČANA IZJAVA VIJEĆNIKA I POTPISIVANJE SVEČANE IZJAVE
3. IZBOR ČLANOVA KOMISIJE ZA IZBOR I IMENOVANJE
4. IZBOR PREDSJEDAVALJUĆEG OPĆINSKOG VIJEĆA
5. IZBOR ZAMJENIKA PREDSJEDAVALJUĆEG OPĆINSKOG VIJEĆA

Dnevni red konstituirajuće sjednice je usvojen jednoglasno sa 30 glasova "ZA".  
Odmah se prešlo na rad po istom.

## **TAČKA 1:**

Svim novoizabranim članovima Općinskog vijeća Gračanica, predsjedavajući Općinskog vijeća Edin Ibrišević je uručio certifikate CIK-e, nakon čega su svi potpisali izjave o prihvatanju mandata. Članovi Općinskog vijeća Gračanica su: AHMETAŠEVIĆ JASENKA, AVDIĆ HIMZO, BEGOVIĆ RUKIJA, ČAMDŽIĆ MIRSAĐ, ĆURIĆ SELIHANA, DEDIĆ DINO, DEVEDŽIĆ ALMEDIN, FERHATOVIĆ HASAN, GADŽIĆ RAHIM, GAZIBEGOVIĆ ADMIR, GAZIBEGOVIĆ SEAD, HADŽIĆ EZANETA, HASIĆ IBRAHIM, HASIĆ MUJO, IBRIŠEVIĆ EDIN, KRAJINOVIĆ NIHAD, MARTIĆ DANICA, MEŠIĆ FADIL, NURIĆ ZAJIM, OMERDIĆ MIRZA, OSMANOVIĆ VEHIĐ, OSMIĆ MIRSADA, PAŠIĆ ESMA, PJANIĆ SAFET, PUŠKAR HASAN, SELIMOVIĆ SENAD, SULEJMANOVIĆ OSMAN, ŠNOBL ZVONIMIR, TOPČAGIĆ MIRZET, TURSUNOVIĆ ESAD.

## **TAČKA 2:**

U vezi sa ovom tačkom dnevnog reda svi članovi Vijeća su dali i potpisali tekst svečane izjave koja glasi:

*«Obavezujem se da ću povjerenu dužnost vijećnika obavljati savjesno i odgovorno, da ću se pridržavati Ustava, Zakona, Statuta Općine Gračanica i drugih akata ovog Vijeća, da ću se zalagati za zaštitu i unapređenje ljudskih prava i sloboda, ravnopravnost građana i naroda i razvoj demokratije u najboljem javnom interesu svih građana općine Gračanica, te da ću predano obavljati povjerene zadatke u cilju razvoja i napretka općine Gračanica, Tuzlanskog kantona, Federacije Bosne i Hercegovine i Države Bosne i Hercegovine».*

Predsjedavajući vijeća Edin Ibrišević je napomenuo svim članovima Vijeća da u materijalu za sjednicu ima i anketni list koji treba da popune svi sa svojim ličnim podacima i dostave Stručnoj službi Općinskog vijeća.

## **TAČKA 3:**

Predloženo rješenje o imenovanju Komisije za izbor i imenovanje, bez učesnika u diskusiji usvojeno je jednoglasno sa 30 glasova "ZA".

## **TAČKA 4:**

U sklopu ove tačke dnevnog reda Esed Mujačić, predsjednik Komisije za izbor i imenovanje iznio je sljedeće:

“U ime Komisije za izbor i imenovanje i u svoje lično ime, načelniku i novoizabranim vijećnicima čestitam na izboru i dodijeljenim mandatima i želim vam puno sreće i uspjeha u zajedničkom radu. Komisija za izbor i imenovanje je u saradnji sa Stručnom službom Općinskog vijeća Gračanica provela proceduru prikupljanja prijedloga za izbor predsjedavajućeg i zamjenika predsjedavajućeg Općinskog vijeća. Nakon dobijanja prijedloga kandidata za izbor predsjedavajućeg i zamjenika predsjedavajućeg Općinskog vijeća od političkih subjekata, Komisija je pregledala i analizirala sve dostavljene prijedloge i utvrdila da je postupak proveden kako je to Statutom Općine propisano. Kada je u pitanju izbor predsjedavajućeg Općinskog vijeća Komisija je konstatovala da su predložena tri kandidata, da su svi prijedlozi dostavljeni u predviđenom roku i svi predloženi kandidati su iz reda vijećnika kako je to Statutom Općine i propisano. U skladu sa ovom tekućom tačkom dnevnog reda i svojim nadležnostima Komisija za izbor i imenovanje predlaže sljedeće kandidate za izbor predsjedavajućeg Općinskog vijeća. Ibrišević Edin, prijedlog demokratskog bloka SDU-SPU, Čamdžić Mirsad prijedlog OO Naše stranke Gračanica i Pašić Esma, prijedlog OO SDA Gračanica. Redosljed kandidata u prijedlogu komisije određen je po godinama starosti i to od najmlađeg pa dalje. Znači, mi smo se jednoglasno dogovorili da prijedlog kandidata predložimo po tom redosljedu. Naravno ovaj

predviđeni redosljed vi možete promijeniti ako smatrate da je to potrebno. Po ovoj prvoj tački na vama je da provedete dalju proceduru izbora.”

Učesnici u diskusiji su:

Vehid Osmanović:

“U ime parlamentarne većine i na osnovu člana 27. Statuta Općine Gračanica i člana 10. stav 2. Poslovnika o radu Općinskog vijeća Gračanica predlažem da se Općinsko vijeće izjasni o javnom glasanju za izbor predsjedavajućeg Općinskog vijeća i njegovog zamjenika. Znači to se odnosi na četvrtu i petu tačku dnevnog reda.”

Rahim Gadžić je upućujući čestitku svim izabranim zvaničnicima iznio sljedeće:

“Vezano za četvrtu tačku dnevnog reda, SDA ima svoj prijedlog. Predložili smo našu damu jer smatramo da u Općinsko vijeće Gračanica treba uvesti novinu i da već jedanput predsjedava Općinskim vijećem i jedna ženska. Vi svi znate da je SDA stranka koja u svakom mandatu ima najviše žena u Općinskom vijeću. Mi smo jedna demokratska stranka, stranka koja ispoštuje da u Vijeće uđu i naše žene. I danas evo vidi se da mi imamo četiri žene. Naša dama je iz Gračanice i smatramo da je najveće biračko tijelo Gračanica i da mjesto predsjedavajućeg treba da pripada onoj osobi koja živi u Gračanici pošto je to većina biračkog tijela na općini Gračanica. Drugo, smatrali smo da će SDP predložiti svog kandidata za predsjedavajućeg. Vidimo evo ponovo da nemaju svog prijedloga. Znači nisu spremni da preuzmu odgovornost zajedno, pošto imaju i Općinskog načelnika, da općinu Gračanica vode u tom pravcu i da preuzmu odgovornost i pred građanima u narednom periodu. Ponovo stvaraju blok sa drugim političkim strankama i izbjegavaju da daju svog kandidata. Mi smatramo da je predsjedavajući Općinskog vijeća trebao biti iz dvije najjače političke partije na općini Gračanica, a to je SDP i SDA. Mi smo to ispoštovali, dali svoj prijedlog za predsjedavajućeg i smatramo da Općinsko vijeće iz poštovanja prema damama jedanput dozvoli da dama predsjedava Općinskim vijećem. Iz tog razloga vas pozivam da podržite kandidata SDA, našu Esmu Pašić.”

Mirsad Čamdžić je takođe prvo čestitao načelniku a i kolegama i koleginicama na izborima i mandatima i nastavio:

“Evo kao što reče kolega Gadžić da su oni inicirali neke promjene i Naša stranka takođe želi da inicira, mogli bismo reći i dosta radikalne promjene u radu ovog općinskog vijeća na samom njegovom početku. Vođeni i osnovnom idejom osnivanja i rada Naše stranke na ovom području, mi smatramo da nam mandat i osvajanje glasova ne treba za osvajanje političke vlasti i političke moći u ovom smislu u kojem je do sada bilo, nego za mijenjanje društvenih procesa unutar naše općine Gračanica. Smatramo da su ovi procesi danas dosta dinamični i da mi treba da odgovorimo novom izazovu i da se uhvatimo u koštac s njime. Naša stranka, s tim u vezi, izdala je jednu platformu u kojoj svim političkim partnerima, svim strankama koje participiraju u Općinskom vijeću Gračanica nudi jednu radikalnu izmjenu. Nudi promjenu člana 29. Statuta Općine Gračanica u kojem tražimo deprofesionalizaciju mjesta predsjedavajućeg Općinskog vijeća Gračanica i tražimo, što sada nije predmet ove diskusije i ovog mog javljanja, smanjenje vijećničkih paušala u iznosu od 50%. Želimo napomenuti da živimo u dosta dinamičnom društvu ali i u jednom drugom obliku i pasivnom. O čemu se radi. Svjedoci smo da ovdje postoje dvije Gračanice. Postoji Gračanica budžetskih korisnika među kojima sam i ja, koja živi ugodno i prilično lagodno, i postoji realna Gračanica, Gračanica privrede u kojoj postoje firme koje se dižu, padaju, gase, dižu plaće, smanjuju plaće i bore se na tržištu. Mi se ovdje ponašamo dosta zaštićeno i smatramo da mi sa ovog mjesta moramo ljudima pred kojima smo stajali, koje smo do juče ponizno molili za glasove, pokazati političku odgovornost i poći sami od sebe. Kasnije kada budemo reducirali javnu potrošnju, a to će sasvim izvjesno vrlo brzo doći, s obzirom kakva je situacija u našoj zemlji i okruženju pa samim tim i u našoj općini Gračanica, imat ćemo moralni legitimitet da se obratimo i ostalim vanjskim budžetskim korisnicima, da se obratimo našim građanima, da mi koji smo sami sebi smanjili paušal, odnosno uveli volontersko mjesto predsjedavajućeg, imamo tu snagu, imamo taj legitimitet. Ja želim da upozorim i vi to odlično

svi znate, 200.000,00 KM košta mjesto predsjedavajućeg Općinskog vijeća, Gračanicu, poreske obveznike ove općine, 50% našeg paušala košta dodatnih 288.000,00 KM. U svečanoj izjavi, negdje pred kraj, dole u četvrtoj preambuli, rečenici, kazali smo da ćemo odgovorno se ponašati prema našim građanima. Da stoje sada naši građani ovdje pred nama, pitanje je, a pozivam vas da se zamislite i da kažete da li bi oni podržali ovo što Naša stranka traži. Da ne bi ovo bila samo demagogija, Naša stranka je predložila mene kao jedinog svog vijećnika na volontersko mjesto predsjedavajućeg Općinskog vijeća Gračanica. Smatram se moralno, intelektualno, zdravstveno i u svakom drugom pogledu vrlo kredibilnim da tu dužnost obavljam. Hvala Gračanici koja je dala glasove Našoj stranci, koja je mene izabrala kao vijećnika i najmanje što ja mogu uraditi za ovu općinu Gračanica jeste da nekih 12, 24 ili 48 sjednica Općinskog vijeća Gračanica vodim volonterski. Ja lično, mogu to izdržati na radijatoru za svoj grad da sjedim 24 ili 48 sjednica, a ne da za to primam i vijećnički paušal koji je izuzetno visok. Zato vas pozivam da pomirite politički diskurs, da razmislite i da se izjasnite o inicijativi Naše stranke da se promijeni jedna rečenica u članu 29. Statuta Općine Gračanica, da se posao predsjedavajućeg Općinskog vijeća Gračanica kao i njegovog zamjenika obavlja volonterski. Hvala lijepo.”

Predsjedavajući Općinskog vijeća Gračanica Edin Ibrišević je dao na izjašnjavanje prijedlog Vehida Osmanovića, da se glasa javno za kandidate predsjedavajućeg Općinskog vijeća Gračanica.

Prijedlog je usvojen sa 17 glasova “ZA”, a 13 “SUZDRŽANO”.

Mirsad Čamdžić je ne izlazeći za govornicu postavio pitanje šta sa inicijativom koju je kandidovao on u ime Naše stranke te zatražio ponovo da diskutuje.

Mirsad Čamdžić:

“U svojoj diskusiji sam dao inicijativu za izmjenu člana 29. Statuta Općine Gračanica u kome bi stajalo da mjesto predsjedavajućeg, odnosno njegovog zamjenika bude volontersko. I tražim od Općinskog vijeća Gračanica da se izjasni o toj inicijativi, da je prihvati, da bude suzdržano ili da je odbije, samo da znamo da je ona pokrenuta, a vi imate legitimno pravo da se izjasnite prema tome.”

Vehid Osmanović:

“Ja bih zamolio, prije svega kolegu Čamdžića a i sve druge koji žele mijenjati dnevni red, to treba da urade kada se dnevni red utvrđuje. Ovdje je dnevni red usvojen jednoglasno i prema tome nema nikakve izmjene dnevnog reda. Dovoljno je da je rečeno da je ovo konstituirajuća sjednica i da sada nema rasprave o promjeni Statuta Općine Gračanica. I ti si glasao za ovaj dnevni red kao i ostali članovi Vijeća, ovo je praktično promjena dnevnog reda.”

Ponovo se za diskusiju javio Mirsad Čamdžić:

“Pa ovdje kad govorimo o ovim stvarima koje govore o štednji, koje govore o 200.000,00 KM koje će nam ostati, onda nam se negdje žuri i koristimo retoriku koju koristi Milorad Dodik kada obrazlaže zašto se 25. novembar ne slavi u Republici Srpskoj. Ja samo tražim da se izjasnite o mojoj inicijativi koja sa ovim za građane općine Gračanica donosi 200.000,00 KM.”

Za riječ se javila Zehra Mujačić, sekretar Općinskog vijeća Gračanica i obrazložila da je u našem Statutu propisana procedura izmjene Statuta naglašavajući da ne može na način kako to zahtijeva vijećnik Čamdžić Mirsad. To je navedeno u članu 118. Statuta.

Rahim Gadžić:

“Ja bih iznio jednu primjedbu našoj Komisiji za izbor i imenovanje. Mi svi znamo i učili smo da dame imaju prednost. Vidimo danas kod izjašnjavanja o našem kandidatu, dami, treba da se izjasnimo kao zadnjem kandidatu. Otkud baš da uzmete po godinama da se izjašnjavamo o

predsjedavajućem. Uvijek su dame imale prednost i danas smo se trebali prvo izjašnjavati o dami kao kandidatu pa onda o ostalim muškim kandidatima. Otkud taj kriterij da se pojavi baš danas kad imamo samo jednu damu kao kandidata i molio bih vas da se korigujemo o ovom prijedlogu.”

Odgovor je dao Mujačić Esed. Naglasio je da se Komisija vodila odredbama u Poslovniku o radu Vijeća u članu 133. gdje stoji da, ukoliko nakon izjašnjavanja dođe do situacije da dva kandidata dobiju isti broj glasova, prednost ima mlađi kandidat.

Nakon ovih diskusija predsjedavajući Vijeća je dao na izjašnjavanje prijedlog da se za predsjedavajućeg Vijeća izabere Edin Ibrišević.

Sa 17 glasova “ZA” i 13 “SUZDRŽANO” kandidat Edin Ibrišević je izabran za predsjedavajućeg Općinskog vijeća Gračanica.

O ostalim kandidatima se Vijeće nije izjašnjavalo.

Općinskom vijeću se obratio i zahvalio na izboru Edin Ibrišević.

#### **TAČKA 5:**

Esed Mujačić je upoznao Općinsko vijeće Gračanica da su za zamjenika predsjedavajućeg stigla dva prijedloga i to ispred SDA kandidat Hadžić Ezaneta i ispred SDP-a Gazibegović Sead.

Za kandidata Hadžić Ezanetu “ZA” je glasalo 12 članova Vijeća a 18 “SUZDRŽANO”.

Za kandidata Gazibegović Seada “ZA” je glasalo 17 članova Vijeća a 13 je bilo “SUZDRŽANO”.

Sead Gazibegović se obratio Općinskom vijeću i zahvalio na izboru.

Za riječ se javio Nihad Krajinović:

“Uprkos početnim nesuglasicama i razmiricama koje su se pojavile, u ime Kluba vijećnika SDP-a Gračanica, svim izabranim vijećnicima općinskog vijeća Gračanica, predsjedavajućem i zamjeniku predsjedavajućeg Općinskog vijeća kao i Općinskom načelniku, upućujem čestitke na izboru i želim uspjeha u radu, prvenstveno sa željom da rezultatima koje ćemo donositi ovdje budu zadovoljni građani. Koristim priliku da sa ovog mjesta se zahvalim i građanima na izboru vijećnika novog saziva Općinskog vijeća.”

Rahim Gadžić:

“Čestitamo na izboru predsjedavajućem i nadam se da će u narednom periodu obavljati svoj mandat savjesno i odgovorno. Čestitamo zamjeniku predsjedavajućeg Vijeća i jedna sugestija predsjedavajućem, da kod pete tačke dnevnog reda smo se prvo trebali izjasniti oko načina izjašnjavanja, da ne bude tajno nego javno glasanje, a možda je to i u želji da što prije završi preskočio, ali bez obzira na to zamjenik predsjedavajućeg je izabran i mi smatramo da je u proceduri bila graška i ko želi da popravi može, ali nama to ne smeta.”

Himzo Avdić se takođe obratio Vijeću i u ime BPS-a uputio čestitke i članovima Vijeća i Predsjedavajućem i zamjeniku koji su izabrani na te pozicije nadajući se da će obavljati svoju dužnost u ime građana a ne u ime stranaka.

Na kraju se Općinskom vijeću obratio i Općinski načelnik gosp. Nusret Helić:

“Evo dozvolite mi da i ja svima vama čestitam na izboru na odgovornim zadacima koji stoje pred nama. Vi znate da je formirana parlamentarna većina a bez obzira na to mi želimo da zajedno radimo u interesu svih građana. I prošli saziv Vijeća je ocijenjen od građana i dosta uspješno je radio. Želim da budemo još uspješniji. Mi smo jedan tim i ako tako shvatimo možemo svi zajedno ići naprijed. Želim vam svako dobro.”

Sjednica je završena u 12.15 sati.

Zapisnik vodila: Mevlida Naimkadić.

Tonski snimak sjednice uredno je arhiviran.

Mevlida Naimkadić

---

**PREDSJEDAVAJUĆI  
OPĆINSKOG VIJEĆA**

Edin Ibrišević

---